

四庫全書

史部

欽定四庫全書

史部

皇朝通典卷十一至
五

編修臣李傳熊覆勘

總校官編修臣程嘉謨

欽定四庫全書

皇朝通典卷十一

食貨十一

漕運

臣等謹按漕運自明開會通河始罷海運陸運而為饋運自支運而變為兌運又為改兌始罷民運法似善矣然明臣邱濬厯言其害甚謂唐宋之不同若今考其弊軍固無室家之樂有轉輸之勞而民

受其害者亦多當時有司漕之責者皆左軍右民
交兌之際軍日益橫需索無饜民雖不任運而其
苦十倍於漕我

朝於運丁則有贍運之屯田有官給之行月有民輸
之贈貼而且貿易土宜利倍十一家室完聚往返
有期軍固無運輸之苦而改軍民交兌為官收官
兌小民免於輓運樂於輸將其所以惠愛軍民者
計至周矣茲纂通典於漕運別為一編按年纂列

至

列聖相承偶遇偏災或蠲免或緩徵或截留或折色諸惠政已列蠲賑冊中茲不具載

順治二年定漕運官司提衡巡察則設總漕巡漕督押則設漕道糧道統領則設總運輓運則設旗甲又監兌官以同知通判為之押運官專以通判為之領運官以衛所守備千總為之四年定各省漕船缺額令運軍自備船裝運自備船不支三修

料價僅給重運銀令其雇募民船七年裁巡漕御史九年定給漕船水脚銀江南蘇州松江安慶廬州並江西浙江等處每石自三錢至三錢五分揚州府每石二錢五分均於隨漕項內動給定官收官兌徵贈貼銀半給運軍十年以白糧無漕船令攢廠成造製鐵斛定式頒發倉場十二年定五年一編審軍丁毋令竄入民籍是年定各省漕運過淮限期江北各府州縣限十二月內江南江寧蘇

松等處限正月內江西浙江限二月內其不過淮
之山東河南二省限正月盡數開行十三年定各
倉收米限期京倉限十日通州倉限七日印給倉
收以坐派紅單到日起限逾限者劾之先是貼造
漕船例於民地徵十之七軍地徵十之三給備料
價其有不敷於江寧各衛屯米每石協濟銀一錢
黃快船每丁協濟銀五分官舍餘丁編為三則上
則納銀五錢中三錢下二錢審定造冊徵收解廠

以供貼造至是飭將各衛所舍餘閑丁按年編審
納銀為幫貼之費十六年漕船回空過淮者責之
漕運總督不過淮者責之糧道覈其船原數闕者
罪之十七年定押運府倖過淮抵通違誤者如糧
道例議罪令折徵灰石米解部撥支十六年禁折
徵漕糧毋得以兌漕為名價外苛索

康熙元年

諭領運官軍依限抵通回空均宜恪守成法如有私販貨

物隱藏犯法人口及盜賣漕糧中途故致船壞者著督漕官並該地方官叅奏嚴提治罪若知而徇隱亦從重處治二年刊發各省漕運全單開列兌糧船數修船錢糧及到次開兌開行過淮到通回空違限日期及驗米色察夾販款目畢具令依式填注違者著該管官察叅并嚴沿途文武官催攢之責有不力者論罪定漕糧完欠分數除帶運米外將餘米併入正項總作十分考覈未完六釐及一分以上不及

二分者經管糧廳罰俸有差三年增造浙江白糧
船六十四號並入漕幫僉運四年定漕船抵通州
限十日回空十一年更定漕船抵通限期山東河
南限三月初一日江北限四月初一日江南限五
月初一日江西浙江湖廣限六月初一日到通均
限三個月完糧如違限不完押運等官計違限月
日各降罰有差又定白糧過淮抵通違限者督運
官議處如督運漕糧例十四年定江蘇白糧照浙

江例抽漕船裝運五年更換十七年增定沿途程
期重運有違限一時以上至違限與原限之期相
等及逾於原限專催督催官各議罰降調革職有
差回空如逆流順流有牘壩之處均照重運定期
無牘壩之處原限十二日者改為九日四日改為
三日三日改為二日一日半改為一日順流無牘
之處原半日改為三時一日改為半日四日改為
二日五日改為二日半如致違限沿途文武官並

隨幫官皆照催儲重運例議處天津至通州重運
係逆流二十里限一日回空係順流五十里限一
日浙江至山陽重運順流四十里限一日逆流二
十里限一日回空順流五十里限一日逆流三十
里限一日違限照例議處至鎮江渡江如因風守
候令地方官報明免議再江西湖廣漕船行長江
至儀徵者因風挽運難以立限應令地方官作速
嚴催出境其自儀徵至天津皆如新定例行是年

准淮北向例止收紅米之州縣紅白兼收著為令
二十二年定漕船載運額數每船載正耗米五百
石土宜六十石並令漕督親督重運至通歲以為
例二十六年申嚴代運之令及該管處分至各衛
所漕船照每年見運之數成造十分之一又定各
省歲修漕船每出運一船給修費銀七兩五錢二
十八年定漕船受兌離次各省巡撫題報限期不
得過二月逾限議處三十三年禁折徵耗米違者

以改折漕糧治罪三十五年定出運每船僉軍一
名其餘水手九名擇有身家并諳習撐駕者雇充
三十七年定江南建平縣漕糧改折耗米例四十
五年定僉軍例四十九年定掛欠漕糧之例除本
軍名下追賠一半外其半令漕運各官照數分賠
五十一年定僉副軍一人隨運並定給漕船來往
限單飭令沿河州縣挨次填注入境出境時日五
十四年定交兌樣米每船用米一石著糧道及漕

運總督加封抵通起卸時其樣米仍作正收

雍正元年免江西脚耗扒夫修倉鋪墊等銀五十萬兩米六十一萬石有奇是年令漕運總督於開兌開幫時將船糧各數運軍姓名冊送戶部查覈二年嚴漕船剝淺擾害商船及包攬貨物夾帶私鹽私藏火器禁裁船政同知其修造漕船事宜令歸糧道管理先是經紀運米到橋車戶運米到倉每米五十袋抽掣一袋一袋短少餘袋例算於

各役腳價內扣賠是年更定制欠之制每石秬米作價銀七錢稭米六錢仍於腳價內扣抵若欠數多照盜賣漕糧例治罪其每秬稭米一石作價銀一兩四錢著地方官將家產變賠三年定漕白糧抵通日期及起卸回空船糧各數並石壩外河水深淺令倉場侍郎五日一次具奏四年

諭押運同知通判抵通之日著總督倉場侍郎送部引見
五年

諭在京各倉委都統副都統御史等每倉各一人專任稽
察之責其支放奏銷等事不必經管惟倉房滲漏墻垣
損壞與倉內鋪墊及匪類盜竊各弊察出即行文倉場
侍郎知之倘不能察出弊端以致虧損倉糧著落都統
及倉場監督等官分賠通州三倉交與通永道通州副
將稽察其失察分賠之例與京倉同並定催漕船成造
歲修銀兩每船給銀三十七兩六錢三分三釐動
支稅課銀每歲給二修銀二兩動支茶果銀十年

期滿照例別造六年定文學生員准免僉運令浙
江徵收漕米無論紅白粳梗概行收納著為令七
年

諭朕聞糧船過淮所費陋規甚多嗣後著御史二人前往
淮安稽查不許官吏需索擾累其糧艘中攜帶物件除
照例許帶外如有夾帶私鹽及違禁等物者亦著該御
史稽察但不得過於吹求以致糧運遲滯至漕船抵通
時其該管衙門官吏及經紀車戶人等恐有向運軍額

外需索者亦著差御史二人稽察淮安于二月初差往通州于四月內差往都察院按期開列請旨時山東河南增設總河是年定漕船經過濟寧臨清二處令河東河道總督題報八年定漕船底料銀向例成造新船將舊船解廠充作底料如無交銀五十一兩九年免江淮興武二衛底料銀十萬八千一百餘兩十一年令河南山東於額徵粟米內改徵黑豆十二萬石十三年復申漕船水手擾害居民之

禁

乾隆元年定截留漕糧各事宜江蘇安徽浙江三省應支本折月糧三修銀准其照數全給其行糧盤耗贈銀負重贈米等項各隨多寡按程期遠近計算江西漕船大米較多遇有截留將原領折耗行月贈銀贈米斛面米均免扣追湖北湖南漕船泊臨洞庭湖風波不測遇截留時例給一半月糧之外每船酌留頭舵水手四名防護每名日給口

糧一升減去人等每站給盤費銀三分米一升照
時值折給二年將河南山東粟米改徵黑豆河南
二萬石山東四萬石裁減江南浙江白糧十二萬
石改徵漕糧以紓民力並定山東自備船回空之
例是年令御史四人分駐淮安通州濟寧天津等
處巡察諸弊三年

恩賞運弁銀人各四兩軍半之是年以湖北通山當陽
二縣僻處山陬兌運較難每石改徵銀一兩二錢

五分制鐵尺用積方之法覈算倉糧旋定各倉貯米每廩以萬石為率其奇零之數別貯一廩四年定漕船遇淺剥運例凡重運所經過淺令河道總督即飭所在有司官具民船剥運其剥船雇值憑有司官酌給五年復定漕糧截留事宜未兌者照停運例給與減半月糧已兌未開者並將三修一項全給七年又定山東河南截留已兌開行者加給銀五十兩江南浙江六十兩湖廣七十兩江西

九十兩免江西南昌江南興武浙江紹興各幫貸
通銀四千六百四十兩復定山東漕船不由漕運
總督給發限單受兌之後即呈報河道總督及巡
漕御史稽察催行時江淮興武二衛運軍有黃快
船避僉者八年俱令歸入民賦以嚴勾考是年河
南粟米復改徵黑豆二萬九千三百五十六石六
升有奇十一年增設河北堡船六十號汧夫百八
十名淺夫三百名隨時疏濬其置造堡船器具夫

工等費於紅馭銀內動支十六年又改河南粟米徵黑豆二萬石十七年定稽察各倉官除都統值班御史在城理訟之期均更番到倉稽查違者令巡漕御史糾叅是年增定稽查倉庾事例京通各倉每倉差御史一人稽查奏明年終更代不實者議處申禁收漕州縣收兌留難之弊十八年

諭向來旗員承修廩座往往慮及工部料估之數不敷輾轉議增議減以至遲延時日嗣後各倉如有應修

工程著工部倉場該旗各派司官一員會同料估修理是年定各倉廩匙鑰封閉之令向例各廩匙鑰交倉場侍郎收執其殘廩用都統御史封條恐陰雨查驗不便茲改交滿漢監督以專責成又收漕甫完即行封閉易致蒸鬱糜爛俟深秋時始行上板加封二十七年定監督期滿即行更代不准留倉例如遇滿漢同時任滿者准倉場侍郎於各倉監督內揀調二十九年令司漕各員不得濫收潮潤

米色並行軍籍紳官富戶規避僉丁詭捏脫漏之
禁三十三年停各倉五年盤驗之例以省糜費三
十七年定糧道親行督運抵淮不得轉委丞倅代
押例四十一年定直省州縣倉庾建於城內者其
收兌稽查令知州知縣自行監督至其地不通水
道者改建隣邑水次以便起運是年

諭令沿河州縣酌量安設緯夫并選派夫頭照管以供
受雇其各帮雇覓緯夫并令押運千總督率旗丁查

點稽核按站交替不許攜帶過站亦不許中途私雇
以專責成不致滋事

皇朝通典卷十一

欽定四庫全書

皇朝通典卷十二

食貨十二

鹽法

臣等謹按鹽鐵之制自漢武帝設立官司除故鹽鐵之富者為吏吏多賈人而山海之利專於上矣唐宋明以來代沿其舊故鄭志所載鹽鐵使筦鹽及鐵與茶類為一編蓋以三者之賦當時專設一

官總司征權故不得不類紀也我

國家蕩滌煩苛俾民樂利於鹽法則惟求裕商益民
故加斤加引蠲逋提綱以紓商力設倉脩貯減價
平值以利民用至於竈戶場丁則減額課給息銀
老幼孤獨則弛例禁准負販凡設官分職皆所以
惠下卹民也若夫鐵冶之產久無征權而茶惟甘
肅陝西尚有茶課他省並無專司其稅或歸關權
或入雜稅與鄭志所載沿革互異自不得仍因其

舊茲纂輯通典謹於鹽法列為一編而於茶鐵則附見征權襍稅編茲無贅焉

順治元年

諭整理長蘆鹽法詹事府通事舍人王國佐條奏十四事
一復額引以疏壅滯一改引部以速引利一便引
價以壯京圉一革防銷以省商賈一除濫贖以伸
商寬一除變價以止姦欺一清楚溺以杜虛冒一
止改告以一引鹽一疏闕禁以通引緝一杜擾害

以清私販一核場竈以清窩園一復兩坵以脩畿
察一免徭助以濟孤商一設賞例以鼓富商部覆
允行二年

詔免陝西本年鹽引額課三分之二河東巡鹽御史劉今
尹疏言河東鹽課向例解貯京庫而給發鹽引率
皆先納銀而後領引商力不敷請循按引納課舊
例定期徵解從之又准劉今尹奏請山西太原府
遼沁二州亦照河東例草票行引又定原食淮鹽

之汝寧歸兩淮巡鹽御史管理原食西和漳縣鹽
之臨洮鞏昌歸甘肅巡按兼管又定河南江北江
南各運司鹽課照前朝會計錄原額徵解是年

詔免各省本年鹽課三分之一核定本年行鹽百七十一

萬六千六百二十五引徵課銀五十六萬三千三

百十兩六錢有奇四年嚴示私販之禁蠲免浙閩

廣東加派鹽課

謹按故明天啟崇禎年間浙閩等省
鹽課加派名色甚多今盡行蠲免

止照萬歷年間
舊額按引徵課

又免江南崇明鹽課又議准山西

鹽法道歸鹽運司兼管六年以四川未定免徵商民鹽課七年定廣西驛鹽事務歸併布政司兼理八年定徵解鹽課毋許於正額外勒索餘銀十二年申禁河東長蘆等處派民納課積弊十五年禮部議准長蘆運司所解青白鹽磚存貯光祿寺庫者歷年存剩六十餘萬斤現在足用令該地方官將應解鹽斤照時價改折尋定上元江寧等八縣食鹽九萬六千七百引將原派綱鹽十三萬八千

八百四十七引仍歸網地行銷十七年嚴回空糧
船夾帶私鹽之禁准四川巡撫張所志疏請新鑿
鹽井仍照開荒事例三年起課其貧民易食鹽斤
在四十斤以上者始令按數納課是年兩淮巡鹽
御史李贊元疏定鹽法八款一每年額引宜帶積
引附銷一清理府州縣私販之源一清理三十鹽
場之弊一嚴飭各道巡緝越販一稽核官引以杜
夾帶一淮北宜併引行鹽一鹽引日增宜照長蘆

河東兩折例加課不加引一溢斤割沒日重宜照所發印簿實填從之十八年准長蘆巡鹽御史張

冲翼疏定鹽引仍照舊例歸部

先是長蘆舊例引存戶部先課後引

自順治十五年戶部發引到司皆爭先求售減價而賣鹽賤引壅遏課甚多是年仍令鹽引歸部

以杜鹽賤引壅之弊並定臨安府屬枯木八寨牛

羊新縣四處食鹽銀兩編入蒙自縣經制全書以

是年為始

康熙元年以淮北引壅議准疏通淮安府等州縣

一萬引改撥寧國州六千五百引和州含山三千五百引三年免廣東逋欠鹽課銀七萬一千一百一十五兩是年定江西吉安府改食淮鹽四年

詔蠲免各省積欠鹽課長蘆巡鹽御史李粹然請並將山東本年竈課銀一萬四千八百餘兩照例豁免從之准廣西巡撫金光祖請暫減廣西鹽引六年定湖南衡永寶三府改食淮鹽從巡鹽御史甯爾講請也又定柳州十一州縣食鹽免其銷引辦課七

年令廣西布政使兼理鹽務改廣東巡海道為廣
肇道管理鹽法嚴陝西鹽引州縣官按畝攤派之
弊又定各省鹽斤聽商人自行銷運九年兩淮巡
鹽御史席特納疏言淮省積弊有苦累商人者六

一曰輸納商人納課例將引數填註限單謂之皮
票而運庫扣勒皮票胥役又有使費謂之照看綱
總又有科歛謂之公運一引之鹽歲費約至數萬
兩二曰過橋商鹽出場例將艙口報驗謂之橋掣
而開橋扣勒引票每引科費數分不等歲費約至
數萬兩三曰過所商鹽呈綱例必造冊擺馬謂之
所掣而未經稱掣先有江掣之費又有茶果之費
又有緩掣之費又有加窩之費歲費約至數萬兩

四曰開江引鹽既掣例必請給水程每引數分不
等又請給挽封每張數兩不等歲費約至數萬兩
五曰關津鹽船既行所過鹽道有掛號之費營伍
有巡緝之費關鈔有驗科之費歲費亦數萬兩六
曰口岸船既抵岸江廣進引每引道費錢餘
不等樣鹽每包穀釐不等歲費亦數萬兩 又言

淮鹽分掣有三大弊

一為加鉅之弊掣官每藉餘
斤虧頭為名不論鹽包輕重

暗掛斤兩每一引增至二三十斤不等二為坐斤
之弊掣官又藉合算底馬為名不論斤重有無豫
定餘鹽非多帶斤兩不能抵償每一引帶至四五
十斤不等一為做斤改斤之弊斤多賂入可以填
少斤少賂不入可以填多掣官于未掣之先疏上
議定使費暗做斤兩已掣之後又暗改斤兩

諭部臣酌議尋議定將私派等款嚴禁勒石立於橋所及

經過關津口岸永行禁止如有違禁者照律治罪
是年又准席特納請停止五十七日豫徵鹽課之

例十二年定長蘆等處鹽務仍令御史巡視

謹按順治

二年定巡視兩淮長蘆兩浙河東鹽政御史各一
員歲一代更十年裁各省巡按御史將巡鹽御史
一併議停鹽務
交與運司管理十三年添設江南安徽驛鹽道其

管理通省驛道改為江蘇等驛鹽道又添設四川
督糧道及湖北驛鹽道俱兼管理鹽務十四年又
改陝西固原道為平慶道管理驛鹽事務十七年

定場竈地丁錢糧照民戶地丁刊刻由單十八年
蠲免福建海澄等十三縣歷年舊欠鹽課二十年
停止奉天銷引凡民人有煎鹽發賣者聽其自行
貿易不必官為經理是年嚴廣東私充鹽商及福
建橫征鹽課之禁二十一年蠲免廣東私渡口鹽埠
額外加增銀六萬五千餘兩從巡撫李士禎請也

是年令廣西食鹽仍復舊例

謹按廣西南寧太平
思恩三府舊例俱食

廉州府鹽鬱林等處俱食高州府鹽後因塘田盡
遷改銷梧州府引是年以二府鹽田既復故仍照

舊例二十二年豁免里甲包賠鹽丁修築銀一萬五

百餘兩二十五年定江西南贛兩府仍食粵鹽

謹按

江西南贛吉安三府原食淮鹽後改食粵鹽康熙五年將吉安一府改食淮鹽十七年南贛二府又

改行淮鹽是年始令仍食粵鹽二十六年准河南陳州項城舞陽

等屬改食長蘆鹽二十七年廣東巡撫朱宏祚疏

言粵鹽利弊一嚴禁大小衙門凡簽商掣鹽納餉

藉公費額外私派一埠商不拘三年一換善良者

永遠承充奸猾者即行除去一鹽引宜通融行銷

以免廢滯一禁私廢埠商課餉派徵田畝致累居民一請於虎門港口惠州浮橋等處專差佐貳駐守盤查以杜透漏一生熟二引

粵省原有生熟二引生鹽出淡水等

場熟鹽出歸德等場

宜隨商掣運隨民買食不拘定額以利

商民一掣鹽之地如佛山距省城止三十里省城

掣定行至佛山應免復掣一鹽價請酌水陸運費

多寡以定價值如遇陰雨量加毫釐一嚴禁奸商

攬和沙土俱從之二十八年免河東本年分額徵

鹽池地租又免長蘆新徵引課及雲南黑井鹽課
是年以陝西花馬小鹽池并臨鞏二府去河東甚
遠其歲徵鹽課令甘肅撫臣就近管轄二十九年
直隸巡撫于成龍以直省宣化各屬地方最苦請
將長蘆額引除去聽民自煎食鹽仍照舊額納課
從之三十二年暫減西鳳二府額銷引鹽之半以
歲歉故也三十八年

詔減兩淮鹽課二十萬兩又減浙江加徵銀三萬一千三

百兩四十三年江南總督阿山疏言兩淮鹽務浮費甚多如賞給差役及餽送贐儀此鹽政差滿所用也又帶行鹽斤隨費飯銀及重收挽封此鹽政書差規例也又如巡鹽到任規費及過所稱掣鹽斤到任預借息銀種種浮費苦累商民請悉行勒石嚴禁從之四十四年

諭朕頃者南巡見直隸山東兩省販私鹽鑄私錢者甚多傳諭該部嚴行禁止四十八年廣東巡撫范時崇疏言

廣東連州樂昌兩處總鹽額引原派行銷本處及
湖南之桂陽郴州等處今請將此項引餉分作十
分量地均勻連樂二處行銷十分之三桂陽郴州
所屬八州縣行銷十分之七其餘各州縣及江西
福建廣西所屬向有廣鹽之州縣有額引多少不
勻者俱令改撥勻銷至贛屬十二縣內信豐龍南
定南三縣原食潮鹽接壤惠州應就近改食惠鹽
從之四十九年定湖廣鹽引無分南北一例通銷

謹按湖廣長岳等十二府一州向行淮引原係酌量地方食鹽多寡通融銷售自康熙六年將向食粵鹽之衡州永州寶慶三府改行淮引遂致各守口岸不能通銷而衡永寶三府又有粵省私販鹽引壅積是以兩淮巡鹽御史李煦請仍照舊例不計疆界一例通銷

五十三年准四

川巡撫年羹堯請成都所屬捷為等七州縣竈戶

增水陸鹽引一千一百四十五張徵稅銀七百三

十兩有奇五十七年准兩淮御史李煦疏請於京

口將軍標下派兵一百五十名千總一員添駐三

江營緝防私販五十八年議准山東膠萊鹽運分

司事務裁併濱樂分司兼管又裁湖北驛鹽道其
鹽務歸督糧道管理五十九年議定兩廣鹽務交
與兩廣總督專理六十年

諭聞江浙私鹽盛行流為盜賊著江南浙江京口將軍等
派兵丁嚴行查拏

雍正元年

上以鹽法弊竇叢生其正額虧欠非由官差需索致窮商
力竭即由商人用度奢靡之故

諭各省鹽政將陋例積習盡情禁革以思裕課甦商之道

又

諭各省鹽政官員崇尚節儉以振頹俗是年議准湖廣鹽

價價賤時每包以一錢一分九釐為率價貴時每

包不得過一錢二分四釐其安鹽每包較梁鹽再

減二釐

謹按楚省有安鹽梁鹽二種安鹽黑梁鹽白鹽質不同故價有低昂

二年議

准廣西鹽法改為官運官銷又議准福建鹽法將

鹽院衙門各官及商人盡行裁革所有鹽課均攤

各場交與州縣官照數收納又議准廣東鹽法將
場商停設委官監收其埠商仍留使完課運鹽內
有無人充商之地著地方官領鹽運銷解價完課
若引多壅積地方有可以代銷者聽其呈明代銷
尋以各省督撫兼理鹽政申

諭各省督撫曰鹽差之弊飛渡重照貴賣夾帶弊之在商
者猶少加派陋規之弊在官者更多若不徹底澄清勢
必至商人失業國帑常虧夫以一引之課漸添至數倍

有餘官無論大小職無論文武皆視為利藪照引分肥
商家安得而不重困賠累日深則配引日少配引日少
則官鹽不得不貴而私鹽得以橫行故逐年之課難以
奏銷連歲之引盡皆壅滯非加派之所致與惟督撫係
封疆大吏巡鹽御史地方官或不奉約束令歸併督撫
則孰敢抗違況欽差猶每年更換而督撫兼理則無限
期必實心奉行嚴除加派庶風清弊絕不負歸併之本
意也議准湖廣江西及江南上江等處每引加鹽五十

斤惟山陽等州縣逼近場竈鹽不易售仍照舊例
不再加

勅查漕船私鹽旋

諭漕船回空夾帶私鹽固宜嚴禁但仍照例在運河口內
派官搜查若至大江不可攔阻搜查有悞漕運議准粵
省竈丁鹽價照舊定之數十分內加增一分又准
廣東舊裁運同一員仍於潮州復設又准福建汀
州府鹽務即令該知府領運辦理又定淡水等場

揀選幹員分委督收皆從兩廣總督孔毓珣請也
三年

諭鹽價之貴賤亦如米價之消長歲歉則成本自重價亦
隨之歲豐則成本自輕不待禁而自減朕意若仍隨時
銷售以便商民均屬有益尋定淮南湖廣等處行鹽以
本年成本之輕重合遠近腳費酌量時價隨時銷
售不得禁定鹽價以虧商亦不得高擡時價以病
民仍令以自取賣鹽值報部湖北巡撫納齊喀疏

言荊州府巴東縣地湧鹽泉居民煎熬請照淮鹽
行引於楚北各州縣分銷從之裁波羅冲可克地
方鹽務通判並駐防官兵五年雲南總督鄂爾泰
疏言黑鹽一井薪本不敷請每百斤加銀四分二
釐又額煎撥給鹽斤每百斤加銀二錢又黑鹽發
價于每斤額定三分內再減二厘得

旨地方出產有舊無而可以新增者亦有舊有而應當裁
減者倘但令增添而不許裁減殊非公平之道且隱瞞

挪移之弊由此而生著鄂爾泰查明鹽斤內所增銀兩
抵補減價增薪之數定議奏聞嗣奏滇省各鹽井新增
正課共銀五萬七千七百有奇減價增薪之數共
銀一萬九千餘兩抵補有餘請如前奏從之河東
池鹽獻瑞產鹽七百餘萬斤六年河南總督田文
鏡疏請汝寧一府引鹽停止知府彙銷令各州縣
招募殷實水商行鹽辦課該州縣按季督催各銷
各引從之鹽政碩色疏請修理鹽池歲撥餘銀羨

銀六千兩以三千兩充歲修以三千兩積至五年

充大修從之五年議准閩省鹽暫令水商行銷試

行三年無誤課食再照兩淮等處例設引商

嗣於乾隆

元年復行招商行引定私梟連坐之法惟大夥窩囤聚眾拒

捕者始將首犯之同甲一併連坐若尋常興販止

治兩隣甲長以不首之罪准兩淮鹽場設立竈長

保甲稽查私弊又禁鹽場竈戶私置盤鏹

謹按深者為盤

淺者為鏹皆燒鹽之具並定淮北晒掃餘鹽令商人收買配

運酌加引課

謹按淮北五場用潮水晒掃成鹽難與火伏一例

七年復設

山東膠萊分司運判

謹按山東舊設分司二員康熙五十八年裁膠萊分司今

復設八年

諭川省鹽課考成惟責之產鹽州縣倘僻遠地方不行官

引必致私販充塞甚為鹽政之弊應將官引通行各州

縣計戶口之多寡均勻分發引張令其各自招商轉運

倘有壅滯責成州縣如此則有司稽查必嚴私販息而

官引銷弊端亦永剔矣長蘆鹽政鄭禪寶疎言山東青

登萊三府所屬之十六州縣票鹽舊係招商辦課
民情未便請除商名聽民自行領票銷賣其應納
課銀攤入地糧徵收從之定地方官經征鹽課全
完議叙之例九年

諭兩淮鹽政著總督尹繼善兼行管理十年定廣東子鹽

配引之例

廣東正鹽之外餘鹽謂之子鹽今定遇
正鹽遲缺之時即以子鹽約配商引行

銷從廣督鄂彌達請加給竈丁鹽價每包加銀一

錢二分

嗣於乾隆元年以鹽價有貴
賤不一又定隨時增長之例

十一年嚴鹽

斤虧短之禁定廣東高廣二府設運判一員專管

鹽務

舊係知府兼管

改設淮南巡道督緝鹽務並於儀徵

等處添設營員

儀徵之青山頭守備一把提一外委一兵一百名江都縣之馬家橋

甘泉縣之邵伯鎮僧道橋各添設把總一員兵三十名

禁埠商設立坐標私

販漁戶幫餉又定湖南新開苗疆之永順永綏等

州縣行銷淮引共增三千七百二十一引十二年

湖南巡撫鍾保疏湖南常寧縣例銷淮引桂陽州

例食粵鹽今桂陽屯丁散處常寧交界地方食粵

食淮不無混淆請將五十四戶屯丁田賦戶口歸併常寧縣管轄其原食粵鹽亦改銷淮引以杜私販之源從之定粵省收買場竈餘鹽以清私販江南總督趙宏恩疏言通泰等州縣漁戶貧民請按戶口多寡於附近場竈餘鹽酌留若干俟漁汛之期填定鹽數照票赴場買鹽彙冊報查從之又准趙宏恩請於淮南儀所添設監掣同知一員十三年兩淮鹽政高斌疏定鹽法四條一折閩川粵及

長蘆商人與淮鹽接界廣開鹽店宜查究治一湖
廣界連川粵宜各選勤幹府佐一員督率巡查一
審鹽案無許避重就輕一江廣水程與引目無異
請歸撫臣就近查核完欠分數檄行驛鹽道勒限
嚴催俱經部臣議准是年八月

皇上御極

諭淮南鹽政鹽課甲于天下兩江三楚皆仰給於淮鹽
課源用以饒裕近聞湖北早禾稍歉鹽未暢銷楚地

夙為魚米之鄉湖魚旺產商得資其醃切藉以完課
今年漢水漲發魚市稀少又湖南因經理貴州苗疆
軍務未及轉運以致漢口鹽壅未銷積至七八百萬
包是今年乙卯綱未能報銷而明年丙辰綱又應起
運兩年並納商力維艱朕心深為軫念籌度變通將
乙卯未完正額為分年帶征自乾隆元年丙辰綱起
按年接運則商力既紓完納自無遲悞從此年清年
額可永無遞壓之虞矣又

諭朕即位之初加意海內民人既降旨將雍正十二年以前民欠錢糧盡行蠲免因查兩淮鹽場竈戶應徵折價錢糧亦有未完之項當與民人一體加恩著該部即速傳諭總督與鹽政將雍正十二年以前舊欠查明奏聞蠲免俾竈戶均霑實惠毋使胥吏作弊中飽

乾隆元年改浙江巡撫為總督兼管兩浙鹽政

舊係

布政使兼管

又裁汰滇省鹽課盈餘以平鹽價

舊例除正鹽

項外有增添盈餘以脩地方公用

又定增斤改引之法杭嘉湖三

所引鹽照兩淮舊額每引增五十斤松江所照淮

海溫台例每引增給鹽四百斤又暫停浙江鹽政

領發餘引

謹按兩浙正引共七十萬一千六百九十八道自雍正七年准督臣李衛請預

發餘引十萬道遞年來增至二三十萬不等茲因冬夏兩掣鹽少儘可敷正引之數餘引暫行停止

又議准雲南黑井等井鹽運昆陽等處行銷鹽價

每百斤減至三兩以下其應減鹽價等項銀六萬

一千餘兩即將各井應減盈餘通融抵補又定廣

西鹽價仍照雍正年間部定之數每斤減價二釐

銷售二年免兩廣鹽課餘平銀兩從總督鄂彌達

請也

謹按兩廣鹽課商人完餉每一千兩於平頭三十三兩之外徵收飯食銀十五兩餘平二

十五兩是年悉令豁免

四年定貴州省古州等處埠銷引徵

課額

謹按古州係新開苗疆向無外課茲定以古州為提埠丙妹永從三角壘等處為子埠由

古州提埠分撥銷售其商人歸古州同知管轄

又停止浙江省儲備鹽斤

先是鹽政嵇曾筠請買餘鹽存貯以備平價之需至是巡撫盧焯以出易之時分派各商腳價甚重且鹽斤銷耗力不能賠請罷之

又免雲南白琅二井節禮及黑井

鍋課銀兩六年定淮商運楚鹽價賤時每引以五兩四錢一分三釐為率價貴時不得過五兩八

錢二分八釐又准每引量加餘息二三錢

謹按前定貴賤

兩價只覈給成本故再加餘息以示鼓勵七年

諭閩省為濱海之區百姓多藉魚鹽之利以為生計朕聞該省鹽課內頗有苦累商民之處如每鹽百斤加增錢二十文至七八十文不等名之曰長價又各場有魚客販買鹽請領道給印票執照或每單徵錢三

文或每石徵錢三文名之曰單錢又正額每鹽百斤
收銀一錢五分各場實收錢百五十文該合銀一錢
六分六厘每百斤申銀一分六釐亦令入官名之曰
銀水以上各項皆巧取陋規不便於商民者著該督
撫確察禁革如有必不可少之襍費即於項内存留
若干減去若干不得仍前多索永著為例又定福建

招商行引

謹按雍正五年即招水
商行銷是年始行請引

每年額領正引

五十四萬五千六十有二餘引四十萬三千百六

十有二如有銷不及額者照例報叅又額外餘引
十二萬三千不註定州縣令各路通融辦銷盡銷
盡報不入年限考成之內八月兩廣總督慶復疏
言粵省各埠額引有難銷者有易銷者請將難銷
埠分撥於易銷埠引中配運行銷並言粵省近年
產鹽甚多其沿海地方鹽壩請改為稻田耕種稻
麥以重本計俱從之十一月四川巡撫碩色以蓬
溪等縣鹽引積滯請酌量改撥於德陽等處就近

行銷從之八年議准兩淮乙卯綱未完引額提入

癸亥綱閏月內帶銷九年以滇省東川等處鹽斤

不敷改四川犍為各廠餘鹽增引行滇接濟民食

其應徵課銀仍照川省舊例計算收納

謹按川省水引一張

徵稅銀三兩四錢五釐陸引一張二錢七分二釐

十年准兩淮鹽政吉慶

請兩淮鹽場添鑄煎鹽盤角二十七副

謹按盤角煎鹽較盤

鐵費省而產多甚為便利

定淮揚預運鹽斤每引加耗鹽二十

斤十一年豁免海贛二州縣之板浦徐瀆中正莞

瀆臨洪興莊等六鹽場帶徵銀兩十二年定運鹽
赴楚裝載船斤例大船均改作小船每船止許裝
載四五百引至千二百引限四十日抵漢口無故
逾限十日以外者准起解官物違限律加等科斷
又建常平倉於湖北漢口以存貯遞年未銷積引
十三年准淮北鹽亦照淮南加耗之例六月每引
加耗十五斤七月加耗十斤

惟五月內中河水淺
尚未掣運不給滴耗

又

諭近年淮商急公輸課頗為踴躍著加恩於引額之外
每引增給十斤俾商本不致虧折民食永資利益又

定豫提額引例如遇本年額引不敷即於次年額

引提銷至次年正綱仍照歲額請領引內註明豫

提字樣以免正綱重複又定運銷江西鹽價

價賤時每

引以五兩五錢七分九釐為率價貴時不得過五兩九錢八分五釐

十四年定江西

鹽價照楚省例每引加餘息銀二三錢十五年定

行運湖南江西鹽價令鹽政每歲會同兩省督撫

按行銷地方年歲豐歉酌定貴賤價值飭商行銷
例十六年

諭朕省方所至廣沛恩膏前因兩淮商衆踴躍急公業
已加恩優獎更念其運綱輸課接濟民食卹商斯足
以惠民特再沛殊恩著將兩淮綱鹽食鹽於定額外
每引賞加十斤在原定成本之內俾得永遠沾受實
惠商人當體朕博愛敦本至意風俗雖不必驟更近
一分返朴之心即遠一分極奢之念殖息無取其三

倍減一分售鹽之價卽利一分食鹽之人其有昂直
網利致累閭閻則深負加恩德意矣又

諭兩淮各場煎丁本屬窮民每因不能接濟向各竈戶
重利借貸以資食用生計甚為拮据著該鹽政酌量
於公項內動銀數萬兩准其赴官借領每年春借冬
還不必加息俾窮民咸沾寔惠是年

上以兩淮丁卯戊辰己巳三綱引鹽專用原定貴價行
銷經部議駁請將貴價盈餘追繳

諭曰恤商裕民本屬一事若任其屢擡時價則於民食有害勒令賤價則商人又以成本有虧紛紛籲請今計各商行銷價值於成本自可無虧即將來年歲不齊不過如今所稱歉歲而止嗣後淮商銷售鹽引即遇應貴之年不得於現在所銷價值外復議加增至於豐稔鹽價可以酌量平減該督撫會同鹽政隨時籌畫部臣亦不必執定例駁詰至部議已賣貴價復令追繳若給還食鹽之戶勢固有所不能若以所餘

歸之官帑於政體又有所不可著免其追繳又准河

東鹽政西寧請酌減河東餘引四萬道

謹按河東餘引自雍正

正十三年至乾隆五十六年陸續增添至二十四萬道茲酌減四萬道其餘二十萬道作為定數

並更正陝西咸寧等處升斗照依部式

咸寧等處舊用升斗

較報部數加重故請改正十七年

諭蘆商積困之餘舊欠甫清若按斤加課商力未免拮据著將所加鹽斤減半納課永為定額其乾隆二年至六年應追未完加斤課銀一十四萬餘兩著一併

加恩豁免十八年准長蘆添領餘引七萬道從長蘆
鹽政吉慶請也又免天津餘引輸納課銀從直隸
總督方觀承請也十九年准兩淮鹽政吉慶請定
私販蕩草出境該管官不行查出者照管理礦廠
官負失察私運銅鐵罰俸一年又准雲南巡撫愛
必達疏請鎮雄州鹽斤仍聽商販行銷即於鎮雄
總匯扼要處酌設稅口抽收每馱一百六十斤抽
稅銀一錢八分俟試抽一年再為定額從之二十

年議准江蘇巡撫莊有恭疏請兩淮新淤草場八千六十一頃八十一畝零有自置埕墾辦鹽者即令其報陞二十一年准兩廣總督楊應琚疏言粵東雷屬海康遂溪徐聞三縣向未設有場員場埕事務俱交商人承辦茲請一體改歸各縣管理二十二年

諭兩淮商衆銷引辦課歲額通完而於地方公事更樂輸恐後著加恩自丁丑綱為始綱鹽食鹽每引加賞

十斤不在原定成本之內以二年為限山西巡撫塔永寧等以本年河東池鹽歉收不敷配運疏請買食蒙古之鹽從之二十三年定蒙古買運鹽斤事宜以隣近之薩拉齊廳並托克托城及陝西皇甫川神木縣四處為蒙古商人交易之所至蒙古鹽斗每斗四十斤有奇酌定每斗價銀二錢四分是年修築河東鹽池以資澆曬從山西巡撫塔永寧河東鹽政那俊請也二十四年河東鹽政薩哈岱

以河東鹽池歉收請配銷甘省花馬大小池等處

鹽斤接濟從之是年准粵西南寧等府土民鹽斤

仍歸官辦

前因粵省官埠欠課侍郎吉慶等請將官運各埠招商定引其各土司鹽斤亦

一體改引茲督臣李侍堯又准兩淮鹽政高恒請

以土司不便請仍交官運

高寶泰等十四州縣食引積壅改撥網地融銷又

准滇省添買粵鹽撥給彌勒縣行銷二十六年議

准河東鹽池被淹鹽少不敷配運二十五年額引

寬至來年六月清繳又續增餘引十四萬道之內

暫行停領七萬道現今鹽價之外每斤酌增一厘
從巡撫鄂弼鹽政薩哈岱請也是年

諭兩淮鹽務經費浩繁商力不無拮据應作何定立章
程著軍機大臣會同尹繼善吉慶高恒等詳悉妥議
具奏尋議定鹽務事宜七條一擬派餘引宜均攤衆
商以普利澤一外支銀兩除公務應用不得濫行
開銷一辦理常貢宜酌定用數以備查核一鹽政
養廉宜裁減五千歸之公項一匣商費用宜嚴加

查察以免通網派累一網食鹽引宜照例行銷不得濫為通融一私鹽透漏宜嚴加查緝以疏引目從之又

諭長蘆本年末完鹽課四十二萬兩令緩至明年奏銷

後分作五年帶徵二十七年停止粵東茂暉等場壟

開鹽壩

先是兩廣總督楊應琚疏言茂暉等場壩開鹽壩嗣因沙土浮鬆基固易於塌壞旋

作旋輟戶部奏行令該督將現在開成場壩一百八十三口造具應陞課銀清冊報部其餘俱應停

止從二十九年准長蘆鹽政高誠請增蘆鹽價值

於原定價外每斤加錢一文又准雲南巡撫劉藻
請加給滇省黑白二井薪本銀兩黑井鹽每百斤
加銀一錢白井鹽每百斤加銀一錢五分是年兩
淮鹽政高恒疏言本年甲申一綱不敷民食請豫
提乙酉綱淮南鹽引三十萬道淮北鹽引十萬道
分給領運以裕民食從之三十年復准高恒請兩
淮豫提丙戌綱引給商接濟是年淮河東頗外存
鹽照兩淮之例配用餘引以濟民食又准長蘆鹽

政高誠請酌增山東行鹽餘票

謹按山東原設額票一十七萬一千

七百四十道雍正八年增餘票五萬道乾隆元年復增一千五百道五年六年復增一千五百道至

是又增一萬五千道三十一年又准兩淮鹽政高恒請豫提

丁亥綱淮南鹽引二十萬道淮北引五萬道給商

接濟三十二年

上恭奉

皇太后安輿

巡幸天津以長蘆通綱引課每年十月內奏銷正值售

銷菜鹽之時鹽價未及收齊而奏銷已屆商力未能舒徐將長蘆通綱鹽課改於十一月底奏銷又以兩浙商人籲懇攜衆赴津抒誠祝

嘏忱悃可嘉加

恩將每引額定鹽斤外加鹽五斤免其輸納課項以一年為滿是年淮南北各場春夏多雨場鹽歉產各口岸亦多被水行銷不暢

諭將已丑綱奏銷展至八月題報三十六年

上臨幸天津以長蘆鹽池被淹商力拮据

諭加恩每斤暫增錢一文以降旨之日為始定限一年
仍照舊值行銷其本年引課分作三年帶徵以紓商
力又山東各商歷年引課無欠而積鹽仍有未銷商
力亦艱

駕至山東

諭將乾隆三十五年正課分作八年帶徵並准照長蘆
之例每斤暫加錢一文定限半年以資充裕三十八

年

諭長蘆商衆貲業素微前兩次巡莅天津閱視釐務深
悉其情是以節次加恩增價帶征今翠華臨幸各商
無不踴躍歡呼但念伊等第一次銀兩業已完繳而
第二次帶徵之銀與本年正課同時並納仍不免少
形竭蹶著再加恩將三十七年正餘課項自三十八
年奏銷後起分限六年帶徵三十九年准長蘆鹽政
西寧疏請將乾隆三十六年第三限銀兩並三十

七年六限銀兩統俟本年奏銷後分限十年帶徵
是年山西巡撫巴延三鹽政常齡疏言河東大池
產鹽歉薄不敷配運請於河東開濬六小池並撥
運蘆鹽接濟從之又准四川總督文綬請令開淘
捷為縣鹽井照例徵收課銀又鹽政李質穎以黃
河水漫淮安鹽堆被浸請將淮北甲午綱未運引
鹽應完正課銀二十七萬五千餘兩准其自己未
綱起分限五年帶徵從之四十年又准兩淮將乙

未網限至來年八月造報並准淮北上年被水各商仍將丙申以後四綱帶徵銀二十二萬餘兩展限四年分作八年完納又

諭河東鹽價未平其小鹽池六處甫經開採接濟所得贏餘未能補足前兩年歉收之數商力不無拮据著加恩照該撫已延三等所請將從前暫增二釐鹽價再行加限三年俾轉運益資充裕四十一年

上巡幸山左見商衆迎

鑾歡欣鼓舞於是

特沛渥恩將山東商人本年應徵乾隆四十年四十一
年引票正項銀三十六萬七千七百餘兩及未完
借項銀二十四萬兩自本年奏銷後起限分作八
年帶徵四十三年定山西巡撫兼管河東鹽務四
十五年

上巡幸江浙途經直隸山東商衆踴躍抒忱加

恩將長蘆商人應徵乾隆四十四年鹽課五十餘萬兩

內十分之一分作五年帶徵其山東商人並將乾隆四十五年應徵票引鹽課銀十八萬餘兩自本年奏銷後起限分作六年帶徵四十五年停止河東鹽池五年輪派商人承辦之例四十七年豁免淮南商人應繳提引餘利銀二百萬兩

先是淮南應繳提引

餘利銀分作二十一限完繳時該商已完繳十三限銀其餘八限尚應繳銀三百八十六萬六千餘兩茲豁免二百萬兩其下欠一百八十六萬六千餘兩仍照原限完繳

四十九年又

將淮南商未繳餘利銀一百八十六萬六千餘兩全

行豁免又免淮南竈戶所有乾隆四十五六等年
帶徵未完銀七千九百餘兩又山東應徵引課銀
三十六萬餘兩長蘆應徵引課銀四十九萬餘兩
准作八年帶徵兩廣總督舒常疏言粵東舊設總
商派捐津貼銀兩散商輓轡轉運積欠甚多請照
乾隆二十三年清查積欠例分限帶徵並將總商
裁革以杜勒派之漸從之

皇朝通典卷十二

欽定四庫全書

皇朝通典卷十三

食貨 十三

輕重上

平糶

常平倉

義倉

社倉

鹽義倉

臣等謹按輕重之說始於管子管子曰民有餘則輕之故人君歛之以輕民不足則重之故人君散之以重其後李悝得其術以相魏每歲視上中下三熟以為糴即視大中小三饑以為糴而平糴之

說詳焉常平義倉和糴者又本於平糴之法也自唐以後積貯非不豐盈至宋又有結糴寄糴俵糴均糴博糴兌糴括糴諸名目原其始意未嘗不欲抑富賈固積居奇之謀而其既也或取以充他用或取以給邊軍甚至挪移補空官自效商賈之為而利其積粟之入於救荒全無實濟大失常平之意矣我

國家太和洋溢年穀順成而

列聖勤求民瘼多為未雨綢繆之計其在直省則設有常
平倉鄉村則有社倉市鎮則有義倉近邊則有營
倉瀕海則有鹽義倉又復以時布截漕之惠定勸
輸之法廣協採之方申遏糴之禁其糴糴也有時
其出納也有制出陳易新不累害於閭閻散滯取
盈嚴漏棄於胥吏

鴻規善政無一夫不沾實澤此所謂萬世不易之良法
也茲仍舊典編目而以平糴常平義社諸倉附焉

崇德元年令八家各出糧百石詣市發賣以充民食六年都察院叅政祖可法等上言二事一杜塞囤積之弊有糧之家或賣或借賣則從市平糶借則從時起息一請開納粟之例論罪大小限以米粟捐贖其平人有急公輸粟者量加獎錄俟秋成豐稔即行停止從之

順治四年江西巡撫章于天上言請發倉米三千餘石減價平糶從之十一年

諭賑濟直隸大臣巴哈納等曰饑民得銀易米維艱殷實之家有能捐穀麥減價出糶者酌給好義匾額及羊酒幣帛以示旌表其豐收處有遏糶者拏問重處尋議定各府州縣常平義社各倉責成各道員專管其應行事宜聽呈該督撫具奏每年二次造冊報部按積穀多寡以定該道功罪十二年定各州縣自理贖鍰春夏積銀秋冬積穀貯常平倉備賑十三年令各省修葺倉廩並印烙倉斛十七年定常平倉

穀春夏出糶秋冬糶還之制

康熙六年令甘肅省將積貯米石變價另糶新穀
以備賑濟七年

諭停止陝西西安等府積穀變價生息十八年巡撫慕天
顏以江寧各屬報災請借撥庫銀往湖廣糶米平
糶從之是年令各省地方官於每歲秋成勸諭官
紳士民捐輸常平倉米穀鄉村立社倉市鎮立義
倉公舉本地善良之人出陳易新春貸秋還以備

賑濟十九年

諭戶部積穀原備境內凶荒若撥解外郡則未獲賑濟之利反受轉運之累人將憚於從事必致捐助寥寥嗣後常平積穀留本州備賑義倉社倉積穀留本村鎮備賑永免協濟外郡以為樂輸者勸是年令奉天城守徵收雜稅購米貯內府修造倉廩名曰備米以備緊急撥用二十一年

命州縣衛所官員勸輸常平各倉穀定議叙之例一年內

勸輸至二千石以上者紀錄一次四千石以上紀錄二次遞加至萬石以上者加一級二十四年議准山海關古北口張家口等處積貯穀石以備蒙古歲歉並令黑龍江墨爾根建倉貯穀二十九年令奉天錦州等處將地丁錢糧每年存五千餘兩酌量米價採買其所收牛馬稅銀三千餘兩亦酌量買米收貯是秋山東豐熟正賦先經蠲免紳衿士民咸及時樂輸巡撫以聞議准不論高粱穀石

每畝捐三合共捐二十五萬餘石三十年令直省
各州縣所捐穀石大縣存五千石中縣存四千石
小縣存三千石遇荒即以此項散給其留倉餘剩
者俱於每年三四月照價平糶嗣又令直屬捐穀
各州縣再加貯一倍是年令江寧京口等處官兵
駐防之地各截留漕米十萬石建倉存貯三十一
年直隸巡撫郭世隆奏言奉天屢登大有請令山
海關監督許肩挑畜馱者進關轉糶從之又

諭通州至山海關所有皇莊及王等莊屯米穀俱照時價轉糴又以山西平陽府等處麥賤

命兵部右侍郎王維珍往糴備貯是年令轉運湖廣襄陽府米二十萬石至西安仍照湖廣價值止加算所運腳費平糴令江西將常平倉米春間出陳秋成後每一石收買新穀二石還倉又定各省常平倉穀石州縣離任時照正項錢糧交代例短少者以虧空論復令西安鳳翔二府及福建浙江等處俱

照山東捐輸之例擇地備貯三十二年以西安米價尚貴

諭戶部招募富商給以正項錢糧聽其於各省購米運至西安發糶米價平後但收所給銀其利息聽商人自取是年令通倉每月發米萬石減價平糶三十三年令將山東運濟

盛京之米酌量截留於金州等處減價平糶又令霸州文安等處貯倉米穀十萬餘石賑給三萬石餘

著減價平糶其沿河一帶景州等州縣衛所各截
留山東漕米二千石平糶三十四年

上以盛京亢旱令支去歲海運米二萬石以萬石散給萬
石平糶又於密雲順義撥轉運積貯之米每月發
千石平糶並運通倉米至密雲順義各萬石貯倉
備用三十五年發

盛京倉儲米穀五千石運至墨爾根阿敦備黑龍江
吉林之賑三十六年議准陝西榆林所屬駐兵衛

堡照州縣積貯是年從山西巡撫倭倫請撥運湖廣倉穀分貯保德州備賑三十七年直隸保定霸州固安文安大城永清開州新安水截運山東河南漕糧每縣萬石積貯平糶是年定四川松潘等處貯穀以二分存貯以一分出借著為例又定州縣及府道等官霉爛倉穀處分之例三十八年截留漕糧十萬石於江南高郵等處平糶四十年又截留二十萬九千餘石於江寧淮安等處存貯備

賑截留二萬石貯河間沙河橋地方備賑三萬石
運至濟寧州兗州府等處州縣充賑是年又於江蘇
截運漕糧十萬石安徽五萬石浙江杭嘉湖三府
八萬石減價平糶四十二年今陝甘積貯倉穀
大州縣貯米三千石次二千石又次一千石每年
於秋成時採買存貯又令各省於村莊設立社倉
令本村誠實之人經管上歲加謹收貯中歲糶借
易新下歲量口發賑四十三年發通州倉米三萬

石至京城平糶又議准各省常平倉積貯米穀定
例大州縣存萬石中八千石小六千石又議准山
東常平倉額大州縣存二萬石中州縣萬六千石
小州縣萬二千石山西常平倉額大州縣存二萬
石中萬六千石小萬二千石江蘇常平倉額大州
縣存五千石中四千石小三千石四十四年議准
河南居數省之中宜積穀以備賑濟山陝令將四
十三年漕米易穀四十六萬五千六百八十二石

於河南府貯二十三萬五千六百八十二石建倉
二百九十三間其餘二十三萬石於近汴近洛之
祥符貯三萬石中年二萬五千石汜水二萬石鞏
縣二萬五千石澠池二萬石偃師二萬八千石陝
州二萬七千石靈寶二萬八千石閿鄉二萬七千
石共建倉三百六十四間四十六年江蘇巡撫于
準請發藩庫銀至湖廣買米平糶從之尋令江蘇
各州縣將截留分貯米石平糶並令各省督撫聽

商人販米出境四十八年以江浙米價騰貴令有司勸諭紳民捐輸平糶並申禁富豪收買囤積之弊四十九年議定陝甘存貯米石於糧貴之年存五糶五糧賤之年存七糶三又令湖廣鎮筸地方酌借帑銀三千兩買穀貯倉開浙江納粟例向例惟江南開例捐監定額貯倉浙江捐納之人多將米運赴江南浙省米貴至是亦照江南例納粟俟貯倉額足即行停止五十一年議准山東省分貯

捐穀大縣一萬石小縣八千石仍於沿河等處酌
留數十萬石以備隣省撥運五十二年發京倉米
一萬石於京城平糶時以廣東米貴發常平倉穀
三十萬石令都察院左都御史趙申喬赴廣平糶
又

諭撥江浙兩省米二十萬石由海運往若廣東豐收將米

一半存貯粵省一半分運閩省備賑

是年浙江歉收惟撥江南五萬石運

至福建五萬石運至廣東五十四年以密雲古北口關隘要地

各運米萬石存貯是年定直省社倉勸輸例凡富
民捐穀五石者免本身一年差徭至一二倍者照
數按年遞免紳衿捐穀自四十石至二百石以上
者令督撫道府州縣分別給匾以示獎勵五十五
年開山海關米穀入口之禁時直隸永平府屬艱
食而關外積米頗多故令暫開兩月以濟關內復
發倉米三萬石貯京倉平糶五十六年發通州倉
積米分運直隸各府州縣存貯並發內務府莊頭

穀石減價平糶六十年直隸山東河南山西陝西

歲歉陝西較甚撥河南湖廣米各十萬石存貯備

賑

五十九年截運漕米十萬石

復發內庫銀五十萬兩又令左

都御史朱軾光祿寺卿盧詢往陝省勸諭富戶照

時價糶賣發直隸山東河南山西常平倉穀分賑

並平糶又令浙江運米三萬石至福建廈門收貯

是年山西建立社倉

雍正元年飭直省督撫查核存倉米石發浙江庫

帑買米三萬石運至福建分貯廈門萬石泉州二府各六千石其餘八千石運赴福州遇米價稍貴奏請平糶

諭河南巡撫石文焯豫省地廣民庶素封之家常喜儲藏米穀以收居奇之利比年荒歉民食維艱其早為籌畫俾富室之粟皆得流通出糶於官以為賑恤之用又

諭截留漕米六萬二千五百九十石於衛輝府存貯撥運陝州收捐米二萬石於懷慶府存貯二年以江浙海潮泛

溢發湖廣江西帑金買米十六萬石運至江浙平
糶河南買米四萬石山東買米六萬石安徽買米
五萬石運至蘇州平糶是年議定社倉事例

諭社倉之設原以備荒歉不時之需奉行之道宜緩不宜
急勸諭百姓聽其自為不當以官法繩之也是在有司
善為倡導於前留心稽核於後使地方有社倉之益而
無社倉之害督撫當加意體察尋議定地方官勸輸米
石暫於公所寺院收存俟息米既多建廩收貯所

捐之數立冊登明若有捐至十石三十石五十石
以上者給以花紅匾額遞加獎勵如年久不倦捐
至三四百石者給以八品頂帶每社設正副社長
二人以司出納其收息之法凡借本穀一石收息
二斗小歉減半大歉全免至十年後息倍於本祇
以加一行息

乾隆三年議定每息穀十升以七升
歸倉以三升給社長作修倉折耗

其出入斗斛遵照部頒公平較量夏則計口給發
冬則依限完納其冊籍登記每社設用印官簿二

本登載數目一社長收執一繳州縣存查其存查之本夏繳秋領冬繳春領凡州縣官止聽稽查不許干預出納三年定各省存倉米麥改易稻穀例又令黔省兵米合計共存三年之蓄減價平糶著為例又以歸化城土默特地方年穀豐成令購買建倉收貯其歸化城大青山黃河岸口亦令建倉貯穀又

諭倉場總督將舊貯米石減價平糶並令近水州縣可通

舟楫者俱赴通倉領運平糶定雲南社倉題報穀數之
例是年以湖廣江南浙江秋成豐稔

命湖廣動支庫銀十萬兩採買於省倉及各州縣收貯四
年從巡鹽御史噶爾泰請以兩淮商捐銀二十四
萬兩并繳公務銀八萬兩建鹽義倉交商人經理
從之是年令京倉減價平糶又定州縣侵蝕挪移
浥爛倉穀之罪是年發通倉米二萬五千石運至
保定平糶又令山西發帑金四萬兩買穀分貯太

平潞大四府各州以五年為例陝西發帑金十二萬兩買穀存貯涼州臨洮鞏昌甘州寧夏各府屬以備撥用又令福建動支正項錢糧運米十萬石存邊海地方又令廣東貯數多者開倉平糶將價銀交數少州縣買貯其廣西捐穀糶三價值亦令採買穀石運交廣東分貯又

諭發倉米五萬於京城平糶又准浙閩總督奏請於江南淮安採買二麥運閩平糶并截留浙江漕糧十萬

石易穀運閩備賑令廣東各營建倉貯穀每兵一

名存穀一石以備借貸

廣東邊海之南澳鎮右營登海二門達濠等營貯穀

五千二百石潮州鎮標三營惠來平海大鵬等營貯穀六千二百石提標五營貯穀五千石督標並

水師六營肇慶城守營共貯穀七千石時

上以江南被水未消蕎麥未能耕種恐交春米價漸昂存貯留運之粟未必敷用下九卿議尋議令該督撫動帑赴產米地方採買再照河工議敘貢監之例將銀兩改為本色分別府州縣大小酌量米穀多

寡俟收足停止令杭州建倉以浙商輸銀買米存貯照兩淮鹽義倉之例隨時平糶五年定盤查常

平之例又增貯浙江常平倉穀百四十萬石

原貯穀七

十萬石

開湖南湖北捐穀事例定山東社倉事例又

建米穀倉六所於江南泰州通州如臯鹽城海州板浦附近商竈地方以備貧苦竈戶緩急之用六年設立京城八旗兵丁米局二十四通州二京師每局給銀五千兩通州每局給銀八千兩凡兵丁

賣米者赴局以時值買貯買者平價賣給七年以
兩翼八旗通州米局生息銀四百餘兩仍留米局
內買米生息著三年查奏一次又撥江蘇貯穀十
萬石截運浙江漕米十萬石運閩接賑八年定福
建臺灣府撥發泉漳等府額粟將官莊現存粟銀
內抽撥採買運往例又定廣東潮州城守三營貯
穀三千石之制是年頒發社倉

諭旨令陝西督撫勒石宣布又申明各社穀借給之例凡

遇荒歉貧民借領倉穀者每石止收息穀十升遇小歉免息還倉八年准淮商領運湖南倉穀於本年湖南岳常二府雨澤稀少之處照時價糶賣令奉天近海州縣運米二十萬石至山東平糶時東省十場二縣存貯竈穀八千三百石零舊無倉廩收貯至是議令移貯府倉以備賑濟是年京城平糶於五城暨通州各增一廩九年山東水發米二十萬石平糶十五萬石充賑又遣科道官齎帑往

天津等處買粟五萬石運赴德州常豐臨清等倉
收貯備賑又於奉天撥粟二十萬石由海運赴天
津轉輸德州接濟其東昌以上近水州縣截江西
湖廣漕運三十萬石存貯備賑又撥浙江省永濟
鹽義二倉及水次州縣穀石赴淮北山東平糶是
年直隸亦發粟平糶增貯江蘇四川兩省積貯江
蘇大縣增米萬五千石中縣萬石小縣八千石穀
則倍之其常鎮二府令於水路衝要處另各貯五

萬石以備轉運四川存貯米穀通計止四十二萬石亦令於三年內買足六十萬石又議準廣東瓊州鎮瓊協龍門協香山協虎門協廣海塞分貯穀萬六百石十年定甘肅涼三州向捐折色者改捐米石設江蘇崇明縣積貯倉貯米萬石十一年撥永平府屬倉穀八千石至喜峰口建倉存貯是年黔省新闢苗疆安設重鎮令於廣西潯州沿河等倉撥穀五萬石分運古州都江建倉存貯又議令

新設苗疆河南七兒堡建倉貯米二千石十二年

建福建厦門積貯倉十三年內閣學士方苞疏平

定糶倉穀三事

一倉穀每年存七糶三設遇穀價昂貴必待申詳定價示期窮民一

時不得邀惠請令各州縣酌定官價先期開糶一
江淮以南地氣早濕若通行存七糶三恐霉爛實
多請飭南省各督撫驗察存倉穀色因地分年酌
定存糶分數其河北五省倘遇歲歉亦不拘三七
之例隨時定數發糶一穀存倉則有鼠耗盤量則
有折減移動則有腳價糶糶守局則有人工食用
春糶之價則有贏餘亦僅足充諸費請飭監司郡
守歲終稽查但穀數不虧不得借端要挾倘逢秋
糶價平賤除諸費外果有贏餘詳明又議定奉天
上司別貯一倉以備歉歲賑濟之用

錦縣寧遠州各貯米十萬石長寧縣貯米五千石
又議准雲南社倉存貯未及千石者於常平官莊
等穀內動撥五百石或八百石作為社本令社長
經營俟足千石之額將常平等穀歸還原款

欽定四庫全書

皇朝通典卷十四

食貨

十四

輕重下

乾隆元年

諭積貯平糶之法原以便民乃聞各省州縣於倉穀出入竟有派累百姓者當出糶之時則派單令其納銀領穀若干及買補之時則派單令其納穀領銀若干

納銀則收書重取其贏餘納穀則倉胥大肆其抑勒甚至以霉爛之穀充為乾潔小民畏勢不敢不領惟有隱忍賠累而已更有山多田少之地產穀無多而該地方官不能向他處採買但按田畝冊籍覈算發價派令百姓將田畝歲收之穀交倉絕不為民間計及蓋藏至有十餘畝之田而亦責其承買米穀者在附郭居民去倉不遠尚可就近轉輸至於遠鄉僻壤離城百里或七八十里之遙亦一概令其領銀納穀

小民負戴越嶺登山窮日之力始至交納之所而奸
胥蠹吏又復任意留難及平糶之日寫遠鄉村更不
能均沾實惠是不蒙積貯之益徒有轉運之苦良法
美意行之不善以致流弊種種其作何變通使閭閻
受其實惠而無擾累各大吏當悉心籌畫令有司實
力奉行以副朕愛養斯民之至意尋嚴禁糶買派累
之弊是年定湖南省存糶例長沙等四十五府州
縣地乾燥者仍存七糶三永州等三十一府廳縣

衛地勢稍濕者存半糶半龍陽等四縣地勢尤卑者糶七存三又議准四川龍安寧遠茂州所屬及雷波衛黃螂所等處地居邊荒風土較異無積貯雜糧性不耐久今每年糶半存半廣東廣州等七府南海等三十九州縣新安等二縣丞所管屬沿海卑濕之區亦如四川例二年又准安徽臨近江湖地形卑下之安慶等府州懷寧等三十八州縣減價糶半存半增設廣東左翼鎮標營倉令動支公

項一千一百餘兩買穀三千石存貯二年行燒鍋

躉麴之禁

北省以麥燒酒者謂之燒鍋

兩江總督慶復巡鹽御

史三保先後疏請撥兩淮鹽運倉穀三十六萬石於揚州平糶從之三年嚴申躉麴之禁又定地方官交代倉穀凡採買續交者限運到之後五日內盤查如採買地遠者酌量定限俟運到交倉再行報部不許虛立文案又題准四川糶賣常平穀價銀買補正項外餘銀均買作社糧以為民倡四年

截留江蘓漕米二十萬石以備平糶之用時江南
浙江四川年穀豐稔各採買有差又採買口外八
溝等處雜糧令直隸提督永常分貯附近各倉又
議准陝西巡撫奏定社倉事例社長限定三年更
換以杜欺弊並將借戶穀數姓名粘貼曉示以除
捏冒是年設立浙江福建四川各屬營倉發帑買
穀分貯五年從河道總督白鍾山請設立河標營
倉買穀分貯又

諭地方積穀備用乃惠民第一要務而州縣有司惟恐
貯穀過多平時難以照料離任難於交盤瞻顧遷延
實為通病今年直隸山東河南江西等省皆獲豐收
而各省奏報年穀順成者頗多況江西湖廣原屬產
米之地皆當乘時料理積貯之政并切諭小民撙節
愛惜毋糜費於無益之地如造酒造麴之事尤宜禁
約又

諭地方積穀恒難充盈而州縣有司往往慮及霉變賠

補以多積穀石為憂其如何酌量定例俾其從容不致賠補之處該部議奏尋議各州縣如地本潮濕難以久貯者令該督撫查照京倉氣頭厰底數目酌減開報估成糶買七年

諭從前蘇撫奏請減價糶穀於成熟之年每石照市價核減五分米貴之年每石照市價核減一錢此蓋欲杜奸民賤糶貴糶之弊也但思荒歉之歲穀價甚昂止照例減價一錢則窮民得米仍屬艱難不沾實惠

嗣後著該督撫臨時酌量情形應減若干預行奏聞
請旨又

諭各省凡遇歲歉米貴之年著該督撫即飭地方官多
出倉穀減價平糶務期有濟民食毋得拘泥成例又
申明平糶減價之令又定江西湖廣於有收之歲
將米值每月咨報他省以便採買八年發京倉米
豆平糶又

諭戶部將倉貯米石酌量給發各旗米局及五城米廠

減價平糶與奇零負販之人俾得糶買九年於通州北路沙河西路蘆溝橋設廠發米二千石南路黃村設廠發米六千石平糶復通州米局時通州兩局歸併一局止留本銀六千兩收買俸米至是從都統永興請仍於舊城內添設一局每局發給本銀萬兩於放米時令地方官稽查先儘兩局收買足數方准民間收買關倉之後官局將所收之米仍減價平糶又撥湖北米十萬石運赴浙省以備

賑糶議定陝西所屬常平穀二百七十三萬三千
有十石按州縣大小分貯咸寧長樂二縣各貯穀
七萬五千石葭州神木等七州縣各貯五萬石綏
德膚施等十二州縣各貯四萬石富平臨潼等七
州縣各貯五萬石乾州三原等八州縣各貯四萬
五千石華州藍田等十一州縣各貯四萬石郃耀
等七州縣各貯三萬石商鄜等十七州縣各貯萬
七千二百餘石同官麟遊等七州縣各貯八千石

興安洵陽等七州縣地氣潮濕易致紅朽仍以現存舊穀四萬四千五百四十石作為定額是年設河南駐防營常平倉二座糴米存貯十年發密雲古北口並喀喇和屯倉糧於熱河平糴發宣化府糧二十餘萬石接濟十一年定福建臺灣常平四十萬之額是年

上以徐淮海三屬係常被水患之處積貯尤關緊要飭令於所屬豐收地方或麥或穀買補並令各省貯

價未買者照江南例分路採買定山西士民所捐
義倉穀俱照直省社倉之例設山東營倉以標息
銀買穀四千石存貯十三年發京倉米給各旗並
五城米局平糶又撥江西米十萬石於江蘇平糶
定直省常平倉額直隸二百一十五萬四千五百
二十四石奉天百萬二十二石山東二百九十五
萬九千三百八十六石山西百三十一萬五千八
百三十七石河南二百三十一萬九百九十九石

江蘇百五十二萬八千石安徽百八十八萬四千
石江西百三十七萬七百三十石浙江二百八十
萬石湖北五十二萬九百三十五石湖南七十萬
二千一百三十三石四川百有二萬九千八百石
廣東二百九十五萬三千六百六十石廣西百二
十七萬四千三百七十八石雲南七十萬千五百
石貴州五十萬七千餘石福建二百五十六萬六
千四百九十石陝西二百七十三萬三千餘石甘

肅三百二十八萬石又定各省常平倉額外積貯河
南省倉貯七十七萬五千一百四十三石有奇江
寧省倉貯萬二千石崇明縣倉貯二萬石浙江永
濟倉貯八萬四千四百三十石有奇玉環同知倉貯
六千石廣東廣糧通判倉貯九萬八千七百八十
五石有奇福建新設臺灣倉貯四十萬石十五年
截江浙漕三十萬石平糴是年

京師發倉粟千石平糴十六年復發米豆十八萬四

千石於

京師平糶是年發浙江常平穀於溫台二州平糶更

定八旗米局為左右二翼米局十七年裁八旗米

局收買銀二萬兩

向給本銀二萬今裁米局故並除之

十八年直隸

義倉告成總督方觀承繪圖以

聞

直隸義倉貯穀二十八萬餘石其有士民捐輸者每年一次專摺具奏凡上年報捐及出借動用之數於

次年二月內奏明又存案以備稽查

諭四川總督黃廷桂酌撥倉穀二三十萬石運往江南

以備賑糶又以湖南巡撫陳宏謀請復運湖南倉穀
二十萬石於江南接濟增湖北常平額四十萬石
二十年以京倉所貯豆糧年久色減令該倉場等
酌定數目分給五城減價平糶其未久之豆令王
公大臣官員等各按品級承買二十一年

上以巡幸江浙

諭撥江西湖南米各十萬石運交江蘇湖北米十萬石
運交浙江並將該二省漕各截運十萬石以備平糶

二十二年以豫省賑借不敷撥江西湖北倉糧運交河南以備平糶又發直隸魏縣元城大名等處倉穀照市價每石減銀三錢平糶二十三年奉

諭旨據劉慥奏州縣出借倉穀每年秋收後不能催完至春輒捏報還倉旋即詳請出借不過令舊借之戶換一新領等語各省倉儲向例春借秋還貧民既得資其接濟穀石亦可以出陳易新而次年貧戶又可再行借給若不如期催令完納而以舊欠作新領則

出借之項年復一年不惟胥役從中影射侵蝕而欠戶逃亡事故勢必終致無著倉儲既虛諒不能另為籌給是名雖設倉備借仍屬有名無實嗣後各督撫務當嚴飭所屬實力奉行除緩徵州縣外所有民欠倉穀各令依限還倉其有捏欠作還以欠作領者即查明叅處是年定旗丁餘米准在通州出糶例

謹按向例

運丁所餘食米俱由坐糧廳衙門給與照票俟回空時於天津沿途售賣而通州水次則例應嚴禁私糶至是令所餘食米聽其在通出糶

二十四年甘肅臯蘭等屬及

關外安西五衛糧價昂貴酌減粟米每石銀二兩
四錢小麥每石銀二兩二錢平糶又令河南巡撫
胡寶琮購麥運京平糶并截運漕糧四十萬石存
貯天津北倉備賑至景州以北被水州縣二次截
留漕糧共四十萬石俱令酌量分貯雲南巡撫劉
藻疏請社倉穀照常平糶數七分為率按年斂散
每石收稅米三升永不收息從之二十五年撥山
東漕米五萬石江南十萬石運京平糶二十六年

准甘肅省收捐納監糧又以安徽省社倉還官穀本
十五萬三千三百六十石歸補常平倉是冬以明春
巡幸江浙令照丁丑年例將兩省漕糧各截留十萬石
在水陸

駐蹕處分廠平糶二十七年發京倉米五萬石及黑豆
分給五城平糶是年增奉天所屬倉貯米石并於
沿海各倉加貯黑豆省會旗倉加貯粟米六萬石
沿海之錦州加貯粟米三萬石黑豆二萬石牛莊

蓋州各加貯粟米二萬石黑豆萬五千石寧遠廣
寧遼陽義州四城各加貯粟米一萬石熊岳復州
寧海秀巖鳳凰開原六城各加貯粟米五千石又
於大同府屬之豐鎮廳朔平府屬之寧遠廳各設
常平倉貯穀三萬石二十八年撥存倉黑豆四萬
石分給五城平糶又撥米萬餘石於熱河平糶三
十年定各府倉穀責成首邑經管例
向例均係
知府經理三
十二年

諭節年以來屢經降旨准令旗丁在通州變賣餘米以資日用現在各該省漕艘陸續抵通於兌足正供後旗丁餘多米石如有情願出售者仍著加恩准其在通州糶賣旗丁既屬便宜而地方糧石益加充裕於民食更有裨益該部遵諭速行

嗣於三十三年至五十年並准糶如例

三十五年

諭今歲適屆夏閏秋成節候少遠而距官員領俸之期亦遲一月市肆米糧未免不敷接濟所有王公大臣

官員秋冬二季俸米即於七月十五日起開倉支放
俾官員早有常糈市值自可藉以平減於民食亦屬
有益又

諭前因直隸被水各屬賑務需米頗多業經降旨將截
留漕糧并撥通倉米共四十萬石交楊廷璋飭屬妥
辦茲面詢該督據奏各屬常平米石尚未買足今年
臨幸天津復經蠲免舊欠米石現在各州縣倉廩所
存尚恐不敷應用著再加恩撥通倉米二十萬石俾

得寬裕賑給貧民口食益資接濟三十六年

諭京城及近畿地方自春入夏雨澤較稀麥收不免歉薄幸有官麥平糶市值未致加昂但現屆青黃不接之時米價或恐因而增長著照二十七年之例於京倉內量撥米石給五城平糶三十七年

諭嗣後各督撫按月奏報糧價務飭屬周咨市值核實詳明列單具奏不得蹈襲積年陋習

奏報糧價自乾隆三年山東巡

撫黃叔琳奏准將貴賤昂平分為等則三十九年

嗣後皆循例奏報至是革除務准時值

撥通州倉米十萬石於天津府屬平糶是年截江

蘇漕二十萬石於淮安備糶四十年定八旗兵丁

甲米遇閏月亦行支放例

兵丁甲米閏月例不支放

四十四年

諭朕明春巡幸江浙所有供宿頓次皆出自帑項絲毫

不以累民第扈從官兵以及外省接駕人等輻輳雲

集經過地方米糧價值恐一時或致騰湧著照從前

之例於江浙二省冬兌漕糧內各截留十萬石分廠

平糶是年截留安徽省潁州鳳陽泗州三府六安霍

山二州縣漕三萬五千石於亳州蒙城平糶四十
六年截留江蘇漕十萬石於崇明平糶是年又截
留江南淮徐漕五萬石於沛縣睢寧豐縣銅山邳
州宿遷等州縣平糶四十七年

諭本年直隸承德府各屬雨澤未溥糧價稍昂現在平
糶存倉餘米二千石以資接濟數日以來甘霖雖已
疊沛而青黃不接之時恐民食未免拮据著再加恩
將存倉餘米平糶三千石以副朕軫念民艱有加無

已之至意

是秋復平糶一千石

又截留江西起運漕米三十萬

石於山東兗曹等處平糶四十八年四川總督特
成額請以未經變價之義倉穀存貯民間以資接
濟從之又

諭明春南巡著照從前之例於江浙二省冬兌漕糧內
各截留十萬石在水陸駐蹕之地分廠平糶四十九

年准甘肅應行平糶地方照例價大加酌減

時以甘肅

逆回滋擾故有是令

五十年准河南截留漕糧三十萬石山

東截留漕糧二十萬石以資平糶又

諭江蘇徐海淮三屬州縣倉儲頻年賑貸所存糧石無多其淮安一屬著該督撫就近酌撥調濟所有徐海二屬鄰近豫東二省地方糧價不無昂貴著即於邳宿一帶水次截留漕米十萬石以八萬石分撥徐州各屬二萬石分撥海州各屬以備賑糶又

諭安省亳鳳等屬上年被水歉收本年又復雨澤愆期農民望澤孔殷未免情形拮据自應寬為儲備俾資

賑卹著於三進邦船內截留漕糧五萬石存貯備用

皇朝通典卷十四